

## **Anna Me·chik Katchinikgipa**

### **Aganchengani:-**

Anna saksa Butchuma Katchinikgipa ong·a. Ua Panuelni deme·chik Asher majongoni ong·a. Ua Gitel Jisu Kristoni gimin uan Re·bagnigipa Kristo ong·a ine parake Israel manderangna u·iataha. Uni janggi tanganio ua uni salrangko name aro kusi ong·e re·atna man·jaha, indiba ua banggija salnasan uni segipa baksa janggi tangrimna man·aiaha. Jeba ong·bo, ua sastroo janapgimin gita saksa Isolna ka·sagipa aro Isolni mikkango re·ruragipa Butchuma ong·a.

### **Annani Pagipa:-**

Anna namen butchuma ong·ahaoba saksa Miriam, Huldah aro Deborah gita Katchinikgipa ong·a (II Chanani 34:22). Ua Panuelni deme·chik ong·a<sup>1</sup>, Panuel bimungni gimin chanchiatode an·ching Jakobni mamatang Laban·oni an·tang jik·dedrangko rim·bite re·bapilmittingo Isolni sa·gre baksa dakgrikgipa biapko Jakob Penuel ine mingaha (Aba.32:30). Penuelni orto Isolni mikkang ine ong·achim, maina Jakob Isol·ko mikkangchongchong nikaha. Indiba ua badita ia Panuel Anna·ni pagipani bimung baksa nangrimani gnang uko name janapanirangko man·ja. Penuelni ortoko niate Jisu Kristoko chong·motan Isolko Mandeni bimango mikkang chongchong Jisuo nikna man·aha ian Penuelni ortoko piltai Kristochi gisik ra·ataha.

### **Annani Ma·chong:-**

Anna Asher ma·chongoni ong·a. Asher Jakobni chetgipa depante nokol me·chik Zilpahni depante ong·a (Aba.30:13). Egypt a·songoni re·bapilani jamano Asher aro Simeon ma·chong Palestine a·songni Jordan·ni saliramchipak a·songko man·rikaha. Uamangoni mingsinggipa Bichal ka·gipa ba Rajarangko onkakatade dong·ja, indiba Niam Gitalo Anna me·chik katchinikgipa ong·kataha (Luk 2:36).

### **Annani Janggi Tangani:-**

Anna gipin me·trarang gitan banga jumang baksa nokdangko dakna haida miksonganirang dong·genchim, uako chu·sokatna gita ua an·tangna segipako baseaha. Uni banga niksamsonganirangko chu·sokatna a·bachengon bilsisni mangmang ong·engon uni ka·sabegipa segipa uko jringirotnan wate don·angaha. Ian mandeni janggi tangbewalo niatode me·chik sakantina namen andalbegipa somoi ong·a. Mikkangchina mamung ka·dongsoani dong·jaha, knalni salko maidake cha·gronggen be·grugimin ka·tongni sing·anisa ong·baskaha. Annani janggi tanganio Mandeni nikanio mamung nama inaniko man·jaha, indiba Isol an·tangni Depanteni rasongo a·gilsakona mande pile re·baon butchumabeoba uko uni rasongna bilake jakkalaha.

Ua segri ong·e bilsni 84 ong·aona kingking namen nengbee janggi tangna nangaha. Uni gisiko mamung kusi ong·e janggi tangani dong·jaani gimin be·enni gita bilgrianirangba una namen saknabeani ong·a. Bangbata somoion indakgipa obostako Israelrang Isolni saoni a·sel inesa chanchiachim. Uandake darangba indakgipa obostao ong·gipa me·chikna ka·sachakani aro una dakchakna sikani dong·jawachim. Batesa indakgipa me·chikrangkode songsalo bewal namgijagipa ine chanchia. Basakoba nama kamrangko chu·sokatanina choljoktelgija somoio saniba semung pamung re·rimna ro·rimna nangoba songsalo mitchia aro chonnike kalstape roanisa ong·achim. Minggipinara mande butchuma budipa ong·ahaode uni nachil knaani srangjahaode sudrang·dedrangba agan·baleke roiachim. An·ching u·ia randi rogipa me·chikma aro me·aparang darangan songsalo agan·baleke, chonnike jokaie roanirangsan bangbataia. Mamung uamangna ka·dimeatani aro ka·saani kattarangko manderang aganrongjachim. Mande uni bilmitting rakmitting somoio jegitaba skia man·a, nokdang baku dakoba darangba uni batangimin sal somoiko ra·bapile manderaa aro simsak nirokanirang dong·jaha. Badita ia a·gilsako manderang ia obostao namen skime an·tangni bon·kamgipa salko nisengsona nanga, namen saknabeani ong·chongmota. Unigimin Isol segri pagrirangna dingtangmancha ka·sae dakchina aganaha.

### **Isolni Segri Pagri Cholgrirangna Dingtangmancha Ka·saani aro Simsakani:**

*'Isolan uni rongtalgipa dongram, Pagrini pagipa, aro segrirangni bichal ka·gipa ong·a'* (Git.68:5). Isol pagrigiparangna aro segrigiparangna chelchakgipa aro warachakgipa Pagipa

---

<sup>1</sup> Who was ANNA THE PROPHETESS? What did ... - Women in the Bible. [www.womeninthebible.net/women-bible-old-new-testaments/anna/](http://www.womeninthebible.net/women-bible-old-new-testaments/anna/) accessed on 22/10/18 at 10:44 Am

ong-a ine iano rongtale aganaha. Isolan pilak cha·songrango Pagrigipa aro segrigipa mamingon ka·dongani grigiparang manderangna aro pilak dakanio onea ka·ako man·giparangna chelchakgipa aro dachakgipa ong-a (Git.103:6). Duk man·giparangko aro kangalna kakketgipa bichalko Isol Jihova chu·sokatgipa ong-a ine Daud uni janggi tanganio u·iaha (Git.140:12). A·gilsakni pilak biaprangon man·echagipa a·songrango ba kangal ong·gipa a·songrango bangbea kangal manderang aro segri pagri janggi duk mikchi baksa janggi tanggiparangan onchepe jakkalanirangko nikna man·enga, unon an·chingni Isolara kangalna ka·sagipa aro bebeko dakgipa ong·ode maikai iarang ong·enga ine chanchianirangko aro bangbata ka·dongani grigipa ong·giparangko nika.

Uni gimin Isolni kattarangko gisik ra·atengoba bangbata kangal cholgrigiparang Isol dong·ama Isol dongode iarang chingna maina ong·enga ine chanchianirangko bangbea manderangni ka·tongo singanirang ong·chongmotenga. Indakgipa chanchianirangko ba singanirangko sokbaahaon Isolni kattarangko ka·dongna man·gijanirang manderangni ka·tongko sason ka·engha. Da·o a·gilsak Isolko manderaana bate a·gilsaknirangko dalbate ra·tokengaha aro uarangchian salanganirangko bangbate man·tokenga, ‘ong·ja’ inoba janggi tanganio uarangko gelna man·gijanirangan gapaiaha, ‘ong·ja’ ine chanchioba janggi tanganio Theory·ko practicalo chu·sokatna manja gitasan dakniktokengaha. Bangbatarangan agana, Isolko u·ia, anga gilja re·jaoba ba name janggi tangna man·jaoba ine chanchianirang aro agananirangko nikbata. Indide an·ching maikai Isolni bebe ong·aniko ra·chakna man·gen, an·ching sastroo indakgipa singanirangna bangbegenoba maidake uarangni bebe ong·anio ka·srokna man·gen?

### **Moseni Niam-o Isolni Kangal Cholgrirangna Simsakani:**

Mi misirangko chimongani somoio pilak midangrangko ga·akrikgiparangko chimongjachina Isol aganaha, maina uarangko dakatani a·selde Isol kangal cholgrigiparangna inditan simsaka aro ka·saa. “...mi misiko raani salo, ...noksikrangko bone ra·nabe, ...raanio gaakrikigipa mi bidangrangko kole chimongnabe....kangalna aro songdongpaaigipana uarangko donbo; **angan Jihova na·simangni Isol ong·a**” (Levi 19:9-10). “**angan Jihova na·simangni Isol ong·a**” bon·kamao indake Isolni aganani a·selde ‘Angan indakgipa Isolsa ine miksonganisa ong·a’, Israelrang iandakgipa Isolni bimingni giminsa janggi tanggipa ong·ani gimin kangalrangna, segri, Pagrigiparang aro pilak cha·asigiparangna Isolni miksonganio janggi tangchina aganaha.

A·bani ge·a gamanirangosan ong·ja indiba Bakchikingni baksa (Tithe)·ko on·anikoba bilsi gittamprakode pagrigipa, segrigipa kangal cholgrirangna on·chinaba aganaha (Deut.14:28-29). “...aro pagrigipa, aro segrigipa, re·bae cha·e okkagen, maikai nangni Isol Jihova nangni jakni dakgipa pilak kamo nangko patina man·gen” (Deut.14:29). Bon·kamao agangipa kattao maiko Isol miksonga rongtala, “maikai nangni Isol Jihova nangni jakni dakgipa pilak kamo nangko patina man·gen” Isol Jihovani bimingni gimin janggi tanganio Isolni miksonganiera pilak kangal cholgrigiparangnaba mamingba nikchangija bon·changija Isolni simsakteaniko aro ka·saaniko nika.

### **Katchinikigiparang-o Isolni Kangal Cholgrigipa Pagri aro segrigiparangna ka·saani aro simsakani:**

Isaia katchinikgipaoni poraiangode Isolni Israel manderangko manenganio mongsonggipa minggittam paprangni gimin manenganiko nika:

1. Gipin isolrangko maniani (idolatry)
2. Til·ek an·chaani (adultery)
3. Kangalrangko onea ka·ani ba onchepe mikchepe ra·anirang.

Isaia 1:16-17 –o an·tangtangko rongtalatchina agananiao kangalko kalstape onia ka·e pap ka·aoniba rongtalatchina ba gisikpilchina janapaniko nika. Maina pilak pap baksa pagrigipa aro segrigipako nikchangani ba galchangani aro onia ka·aniara mamingdakeba chonbatja, indiba

Israelni paprangoni an-pilchina agananiao katchinikgiparangni janapanirango pagri aro segrigpana kragija dakani giminba mongsonggipa dake aganaha (Isaia 1:23).

Isaia 11:1- 4 –o Katchinikgipa Kristoni ministryni ong-gnini gimin agansoanioba kangal cholgrirangna Kristoni ministry watchangijaniko agansoaha. An-tangtangna suake janggi tanggenchimoba kangalko ga-belbelani Isolni kusi ong-ja ine Amos katchinikgipachiba gisik rakataniko on-aha (Amos 5:11, 8:4, 6).

Sodom-ko nasiatani gimin bangbataon til-ek an-chaani papni giminsa nikatbata indiba Ezekiel katchinikgipani ki-taponiko niatskaode gaoradeani, simsakgija cha-betbonge kangalko gisik ra-gijani a-selko nikgen (Ezek.16:49).

### **Isol Niam Gital-oba Kangal Segrirangna Kakketko Dakna Aganaha:**

Israelrang an-tangtangko Abrahamni dedrang ine aganade namen kusi ong-a indiba gangrigipana aro pilakonikon tik dake ra-china aganaha (Luk 3:8-14).

Galili sagalni Tiberias sagal rikamo Jisuni skianiko knatimna jinma bange re-baaha aro atamangahaora, "...Jisu mikron nichaoe jinma bange an-tangona re-baako nike Phillipna aganaha, lamang cha-china an-chinga baoniko cha-aniko bregen?" (John 6:5). Matini Sea Nama Kattaode Jisu 'ka-sachakaha' ine janapaha (Mtt.14:14). Jisu agana, *'alaniko dakon kangal, jakkora, jakkora, kanarangko okambo. Unon na-a an-senggen; maina naina nangna on-pilskana uamango dongja...'* (Luk 14:12-14). Jisu maikai kangalna simsaka aro uamangnaba maming watchangani gri ka-saa, salgio ong-gnini gimin agansoanioba kangalrangko onia ka-ani aro cha-asigiparangna simsakgijanina agananiao uan an-tangan kangalni bimango re-bagipa ong-e bichaloba ua badita kangalrangna dakaha uno pangchake bichal ka-gen. Bichalo manderang jringjrot man-gnikoba gimaatani dong-gen ineba niksoa (Mtt.25:42-45).

Mande a-gilsako dong-mittingo badita kangalrangna aro segri pagri bi-sarangna ka-sae simsake dakgenchim uan uni torom ong-a. *"An-chingni Isol aro Pagipani mikkango rongtala aro marang gri torom kam ian, Uamangni duko ma-a paa grirangko aro segrirangko niroka, aro an-tangko simteka gri a-gilsakoniko rakia"* (Jakob 1:27).

Unigimin Isol Niam Gitcham aro Niam Gital Sastroo mamingba ding-tangani aro baseani grian kangalrangna aro segri pagri aro chol apgrigiparangna simsakgipa aro ka-sagipa ong-a. Isol pangnaba ding-tangijagipa Isol skangonin aro ong-gnirangoba kangalrangna simsakani aro ka-san gapgipa Pagipa Isol ong-a. Apsan daken Isol an-tangni manderangkoba kangalrangna aro cha-asigiparangnaba simsakaniko nangnika, *"Kangalna ka-sachakgipa Jihovana gro bota, Aro ua uni dakaniko una on-skagen"* (Toe Skiani 19:17). Solomonni aganani gita gisik gnanggipa ma-gipa, *"Ua duk mangiparangna antangni jakpako badala; Ua kangalgiparangna antangni jakrangko snila"* (Toe Skiani 31:20). Kangal aro cha-asigiparangna simsakgijagipa uni bi-anirangna Isol aganchakjawa *"Kangalni grapana nachiltangko rim-tippgipa, Uaba grapgen indiba knachakako man-jawa"* (Toe Skiani 21:13), aro kangalna ka-sae nirok-simsakgijagipana sao on-aniko sastro aganaha (Toe Skiani 28:27).

### **Annani Janggi Tanganio Manderangna Skiani:-**

Anna agangimin gita be-en aro gisikni saknanirang baksa janggi tangna nanggipa obostao ongenchim. Ua segipa baksa banggija salnasan duk sukko apsan chakrime janggi tangna man-aiaha. Uni janggi tanganio adita aiao inmananiko uoniko an-ching nikna man-a.

#### **1. Worship and Devotion:**

Ua torom noko pangnan dongrongaha (*'ua torom nokoni reanggija... wal sal olakkirongachim'* Luk 2:37 b,d), haida ua torom noko pilak olakkiani bakon dongrongaha, jedake jinma olakkianio aro saksan olakkianio. Ian uni Isol baksa pangnan ong-ronganiko aro Isolni mikkangaoni (In the Presence of God) uni ekanggijaniko mesoka. Pilak duk-suk ba nengnikani somoioba ua Isoloni ekangjaha

batesa, ua Isolni mikkango ong-na mikchabataha. Haida uamangni pagitcham gita 'Jihovani niamo uni kasrokani ong-a' Git.1:2a.

An-chingni obostachiko niatode mondoliogipa manderang saksangrik Isolko olakkiani (Personal Devotion) dong-gijaniko bangbaten nikna man-a. Jinma gilja noko olakkianide namen komibe. An-chingni mondolio ong-ronganiko niatode haida member sak 300 dong-ode sak 75 mangsan re-rongaigen, aro uarangoni me-chikma aro me-tra bi-sarangsang bangbataigen. Isolni mikkango am-ani namen komisranga, sastro poraie Isolo bi-anide namen komisranga ine an-ching nikna man-a. Maikai Isolni skaniko aro Isolni kam ka-aniko u-ina man-gen. Isol dong-a inoba Isolna kenani aro una bamna skanide dong-srangjaha. Indiba Anna me-chik katchinikgipa namen butchumabegipa be-enni aro gisikni gita duk aro nengnikanirang baksa biljrimbee janggi tangoba Isolni mikkango am-ani aro unbaksa re-rurae janggi tanganiara namen an-chingna ra-biani ong-chongmota.

## 2. Prayer and Fasting:

Ua olakkiasan ong-ajaha, indiba ua bi-aha aro okumu chake Isolo bi-rongaha (*okumu chake aro molmole. Luk 2:37c*) ine nika. Ian uni janggi tanganio mairongpilgipa uni an-tangko on-kanganiko mesoka. Maina adita manderangsang indake dakna man-a, maina darangba an-tangko on-kanganiko dong-jaode aro ka-oksiani dong-jaode okumu chake bi-na aro molmolna man-chongmotja.

Bi-ani aro okumu chake bi-aniko aganode an-chingni Mondolio namen bilgri bataniko nikna man-a. Da-ororoni Jisu Kristoko bebera-giparanga okumu chake bi-aniko aganode dakrongjae man-ja inesa aganronga, indiba basako dake nigen. Anna Katchinikgipade indita butchumabegipa ong-oba okumu chake bi-aha. Indake Isolna ka-oksiganipani gimin Isolni kattao agana: "*Singho damberangni cha-asiani ngang, aro uarang okkria; Indiba Jihovako am-giparang mamung namako cha-asijawa*" (Git.34:10).

## 3. Evangelism:

Ua Kristo Jisuko torom noko man-e Isolko mitelaha, aro Isolni Kristo Jisuo piokgniko aganprakataniko dakataha (ua rebae Isolko mitelaha, aro Jerusalemko piokako nisengsogipa pilaknan uani gimin aganaha Luk 2:38). Isolko olakkie aro mitele janggi tangna aro tomtome dong-na an-ching sakantinan katchabeani ong-a, indiba Jihudi manderang jerangan ia mande bi-sa atchigipani gimin knaon rajarangna, sason ka-gipa aro toromko dilgiparanga jajrengani ong-gipa kattako jekon Isolni sa-grerangsang manderangna tom-tomani aro Jokatani gimin aganprakataha ua piokgni kattako agana altubeade ong-jachim.

Da-alo an-ching sakantian giljachi re-rongna aro mondoli janggi tangna katchabeani aro chu-ongnikani ong-a, indiba Nama Kattako knakugija manderangna aganprakna aro Missionni kamko ka-na sakantinan rakbegipa kam ong-chongmota. Mondoli gitaba aro Nokdang gitaba gimagipa janggirangna ka-oksiani namen komiasrangaha. Batesa nokdango katchae janggi tanganikosan manderang am-rongbata. Mondoli gitaba bangbata somoion mondolio namnamgipa gilja nokrangko riknasan aro mondolitango kusi ong-e Program-rangko ong-atnasan bimchipaniko nikna man-a. Mondoli dilgiparangi jakchakgijanirangara mondolini manderangni dengi dakani giminsan ong-bata, indiba Jokatani Nama Kattako knakugijagipa manderangnade banggija somoirangkosa jakkalronga, ian namen ting-gilani ong-chongmota.

## Bon-kame Agandapani:

Anna katchinikgipani gimin poraiengon me-chik segrirangna maidakgipa nengnikanirang dong-achim uarango gisik raatna dakchakaha, aro Isolni segrigiparang maikai simsakachim uko nikatjole gisiko ra-bianiko on-na sikgenchim. Bangbea Isolni manderangba me-chik segrigiparango ong-gija dake jakkalsretanirango cha-grongenga, unigimin Isolara maina sastro dingtangmancha me-chik segrirangna aro pagrigiparang simsakaha niate mikaoatani man-genchimode Isolba kusi ong-genchim ine chanchiatna man-a. Minggipin Anna katchinikgipa namen bilgribee janggi tangahaoba ua Isolko olakkiako watjaha, bi-anio dong-kamaha aro Jisuni giminba manderangna aganprakataha ine nika. Uni indakgipa butchumaonaba Isol baksa sepang ong-e janggi tangani daalo an-chingnaba ra-biani ong-ode dingtangani an-ching sakantina ong-an baksa Isolni patianikoba man-pagenchim.

\*\*\*\*\*